



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Oe-cusse

05 Juñu 2014

Tribunál Distritál Oe-cusse julga kazu krime ho natureza violénsia bazea ba jéneru

Iha 26 to'o 29 Maiu 2014, Tribunál Distritál Oe-cusse kontinua hala'o julgamentu ba kazu violénsia bazea ba jéneru. Iha komunikadu ida ne'e JSMP limita deit ba krime violénsia doméstika no krime la halo tuir obrigasaun alimentár ne'ebé Unidade Justisa ba Feto no Labarik observa.

JSMP nota katak krime ho natureza violénsia doméstika kontinua aumenta. Tuir orariu julgamentu iha tribunál kada lora sempre julga kazu violénsia doméstika. Realidade ne'e bele haree hosi agenda ka orariu julgamentu semana dahaat fulan Maiu nian, JSMP konsege halo monitorizasaun ba kazu neen (6), ne'ebé kazu haat (4) konstitui nu'udar krime violénsia doméstika no kazu rua (2) la halo tuir obrigasaun alimentár.

“JSMP hanoin katak tribunál sira tenke avalia opsaun sentensa ne'ebé durante atribui ba arguidu sira iha kazu violénsia doméstika nune'e bele iha implikasaun ba sosiedade atu hadia sira nia mentalidade no prátika lor-lora nian,” dehan Diretór Ezekutivu JSMP, Luis de Oliveira Sampaio.

JSMP prezume katak suspensaun ba pena prizaun iha kazu ho natureza violénsia doméstika bele sai hanesan fator ida ne'ebé kontribui ba iha número violénsia doméstika ne'ebé kontinua sae makas, tanba la iha efeitu ne'ebé hatauk ema atu komete krime ne'e.

Kazu sira ne'ebé JSMP observa durante semana dahaat ne'e mak inklui violénsia doméstika ne'ebé involve oan hasoru inan-rasik ida (1), la'en hasoru fen tolu (3) no kazu separasaun no abandonu rua (2).

JSMP observa katak durante julgamentu laiha inkeritu apropiadu atu promove akuzasaun ne'ebé di'ak, nune'e bele konvense tribunál halo desizaun ne'ebé apropiadu tuir kazu ida-idak nia gravidade. JSMP mós hanoin katak Ministériu Públiku tenke konsistensia ba akuzasaun, eskolla alegasaun ba pena tuir faktus krime ne'ebé produz iha julgamentu no sirkunstánsia agravante hale'u krime ne'e. Tanba faktu nesesariu sira ne'e mak sei hametin pozisaun Ministériu Públiku atu husu ba tribunál aplika pena ne'ebé kontribui ba prevensaun krime iha comunidade.

JSMP fiar katak se autór tribunál sira atu aplika sentensa ne'ebé apropiadu iha kazu violénsia doméstika tuir nivel gravidade husi krime ida-idak, ne'e bele redus númeru violénsia doméstika iha futuru.

Aleinde kestaun sira ne'e, JSMP mós observa katak Tribunál Distritál Oe-cusse hatudu progresu pozitivu tanba kuaze laiha ona kazu pendentes iha tribunál. JSMP hetan kazu katak krime sira ne'ebé akontese iha fulan Feveireiru 2014 komesa ona julga iha Maiu 2014. Husi progresu ne'e bele konklui katak autór judisiáriu husi Tribunál Distritál Oe-cusse ezerse sira nia servisu di'ak tebes hodi reduz kazu pendentes sira no hasae konfiansa publiku ba setór justisa.

Julgamentu hirak ne'e preside husi juis Dr. João Ribeiro, Ministériu Públiku representa husi Dr. Alfonso Lopez no arguidu sira hetan defeza husi Dr. Calisto Tout husi Defensória Públiku no Dr. João Dum, hosi instituisaun Advogadu Privada.

Atu hetan informasaun kle'an liu tan favór kontaktu:

Luis de Oliveira Sampaio

Diretór Ezekutivu JSMP

Telefone: 3323883|77295795

Diresaun e-mail: luis@jsmp.minihub.org

info@jsmp.minihub.org

Website: www.jsmp.tl

Facebook: www.facebook.com/timorleste.jsmp

Twitter: @JSMPTl